

Cangreu Blauw tin su balor ecologico, nos mester protege



ORANJESTAD - E Cangreu Blauw ta pertenece na e clase di crustaceonan den e orden di Decapoda y e genero Cardisoma. Tur esakinan por zona hopi straño pero asina ta clasifica e diferente especienan pa haya sa e origen di nan antepasadonan.

E nomber científico ta Cardisoma Guanhumi. E ta un cangreu di tera, no di lama, y mayoria biaha di color blauw. Por aprecia nan den areanan cerca di costanan mas tanto unda tin hopi matanan di mangel y cu e suelo ta humedo.

Den e relato aki Directie Natuur en Milieu kier ilustra con e Cangreu Blauw ta, unda nan ta biba, kico nan ta come, nan balor ecologico y e peligran cu e cangreunan ta haya.

Por identifica e Cangreu Blauw pa e siguiente caracteristicanan: un casca hanchu y rondo; e parti ariba di su casca tin un bulto halto di manera gerijs; su wowonan ta pijlo ariba di color preto; su tenglanan (pianan parti dilanti) ora e yega adulto ta desigual; uno semper ta mas largo y mas desaroya cu e otro. Mayoria biaha e tenglanan ta dos biaha mas

grandi cu su casca. E pianan parti pa-tras ta 4 cada banda y nunca ta mesun largo. Nan size ora di yega adulto ta pa e machonan 52mm y e embra por bira 53 mm.

Nan colornan por diferencia un poco ora nan ta jong. Nan ta color maron, y den fase di transicion nan ta bira color biña of oranje. E embra den temporada di pone webo ta bira geel of te hasta blanco. E cangreu tin un dimorfismo sexual (na unda ta reconoce si e ta macho of hembra) esaki kier men cu e machonan tin un abdomen cu un forma di e letter V of forma triangular.

E embranan tin e parti abou rondo y e parti abou casi cubri ful, te na e rand di su casca. E cangreunan embra ta yega madurez di reproduccion den 4 año. E embranan ta carga e webonan bou di su curpa pa mas o menos 2 siman, prome cu e cana bay pa lama na unda e ta laga esakinan bay. Un embra di 50 gram por laga mas o menos 10,000 webo cay. Asina cu e cangreu dreña awa di lama, e webonan ta los y bira larva.

E temporada di pone webo por sosode te hasta 4 biaha den un año entre



e lunanan di juli y december, ora di luna yen durante 2 anochi. E cangreunan por muestra di tin menos actividad den temporada di segura y nan holnan ta mas tapa y asina cu tin mas yobida nan ta bira mas activo y ta sali.

E cangreunan ta biba mas tanto den cercania di lama of costanan, den e ecosistema di e matanan di mangel na unda e tera ta muha y di lodo. Nan ta coba buracan te unda nan ta haya suficiente humedad pa nan desaroyo normal. E cangreunan ta come: matanan cu a decomposita den lodo of cu a bira moli; insectonan lastrero; scorpion di mondi; resto di parhanan, y otro bestianan morto.

E cangreu tin un balor ecologico halto pa e boskenan di e matanan di mangel cu tin na nos costanan. E conservacion di e Cangreunan Blauw ta crucial pa e preservacion di mangelnan, y nan ta organismonan cu no por keda afo di e cadena di alimentacion. Nan ta yuda den e proceso di putricion di matanan y asina forma e suelo pa e crecimiento di e matanan.

Claramente e cangreunan blauw ta na peliger na diferente momento di nan desaroyo. Un di e menasanan mas grandi ta hende. Den cultura di paisnan bisiña nan ta uz'e pa consumo y tambe pa comercio local. Esaki ta peligroso pa salubridad mirando cu no tin control di higiena pa malesanan cu e especie por carga. P'esey mes hende No mester coy e cangreunan pa consumo. Pero tambe mester menciona cu door di desaroyo y trahamento di caminda sin tene cuenta cu crusamento di cangreunan, por limita nan di yega lama. Durante temporada di migra pa pone webo, e automobilistanan ta trapa e cangreunan na cantidad halto matando e embranan cu ta carga cu webo pa bay pone. E pikimento di palonan (driftwood) na lama tambe ta stroba crecimiento di e cantidad di cangreunan. Na unda mayoria ta sconde den nan fase hubenil.

DNM ta suplica un y tur pa ta alerta, ya cu den e dianan aki lo bay tin crusamento di cangreunan blauw na Pos Chiquito. Sea asina bon di notifica nos inmediatamente via nos facebook page dnmaruba of yama 594-8706.

